

**KANTONALNA  
PRIVREDNA  
KOMORA TUZLA**

**BROJ 8-10/24,  
avgust - oktobar  
2024. godine**



# **KOMORSKI INFORMATOR**



Implemented by



**KANTONALNA PRIVREDNA KOMORA TUZLA  
CHAMBER OF ECONOMY OF TUZLA CANTON  
KANTONALE WIRTSCHAFTSKAMMER TUZLA**



**PRVI MASTER TRENERI  
ZA OBUKU MENTORA ZA  
PRAKTIČNU NASTAVU U TK**



**KORAK BLIŽE PRAKSI:  
INFO DAN O REALIZACIJI  
PRAKTIČNE NASTAVE**



**DELEGACIJA ISTARSKJE  
ŽUPANIJE U KOMORI**



**PREDSTAVNICI AUSTRIJSKE  
AMBASADE U KOMORI**



## Komorski informator

# Uvod

Poštovani čitaoci!



Glavna tema koja je obilježila i prethodni period jeste realizacija dvogodišnjeg projekta „Unapređenje okvira za integraciju dualno organizovanog obrazovanja u Tuzlanskom kantonu“ koji za cilj ima unapređenje saradnje škola za srednje stručno obrazovanje i obuku i poslovnih subjekata u Tuzlanskom kantonu i sistemski pristup za uvođenje elemenata dualno organizovanog obrazovanja. Nakon uspješno provedene obuke za master trenere, sedam učesnika iz Tuzlanskog kantona je uspješno položilo završni ispit i dobilo certifikat master trenera za obuku mentora praktične nastave. Održan je i Info dan za realizaciju praktične nastave kod poslovnih subjekata na kojem su predstavljeni zakonski okvir za realizaciju praktične nastave, te program i priručnik za obuku mentora praktične nastave u poslovnim subjektima.

Pored ovih aktivnosti, u Komori su upriličene i dvije posjete visokih zvaničnika. Bilježimo posjetu trgovinske savjetnice Austrijske ambasade u Bosni i Hercegovini Kantonalnoj privrednoj komori Tuzla, a u okviru posjete Gradu Tuzli, u posjeti Kantonalnoj privrednoj komori Tuzla boravili su predstavnici Istarske županije.

Uzmeđu ove dvije posjete, članovi Odbora Udruženja proizvođača mlijeka Tuzlanskog kantona pri Kantonalnoj privrednoj komori Tuzla, održali su 10. po redu sjednicu.

Ono što je konstanta i prepoznatljivost Kantonalne privredne komore Tuzla jesu sajamske aktivnosti u Bosni i Hercegovini i regionu. Već krajem avgusta je „Privreda TK“ tradicionalna sajamska postavka bila prisutna na sajmovima, prvo u Gradačcu pa potom u Bihaću, Modriči, Tešnju. Redovno predstavljamo svoje članice i na sajmu namještaja u Beograd koji je ove godine imao 60. izdanje.

Uz informacije o aktivnostima u firmama članicama Komore, novostima iz Vlade Tuzlanskog kantona i Grada Tuzla, ovo izdanje Komorskog informatora donosi još i najave za preostale sajamske aktivnosti u 2024. godini...

Dino Kalesić  
gl. i odg. urednik



## Komorski informator

# Sadržaj

### KANTONALNA PRIVREDNA KOMORA TUZLA

### KOMORSKI INFORMATOR BROJ 8-10/24, avgust - oktobar 2024. godine

#### IZDAVAČKI SAVJET:

1. Nedret Kikanović, član
2. Elvir Salihović, član
3. Suad Selimović, član
4. Edina Kurtić, član

#### REDAKCIJSKI KOLEGIJ:

1. Nedret Kikanović, član
2. Almir Mešić, član
3. Edina Kurtić, član
4. Suad Selimović, član

#### IZDAVAČ:

Kantonalna privredna  
komora Tuzla

#### GL. I ODGOVORNI UREDNIK:

Dino Kalesić

#### TEHNIČKA PRIPREMA, REPRO I ŠTAMPA:

GRIN d.o.o. Gračanica

#### ZA ŠTAMPARIJU:

Mirnes Salihović, direktor

#### TIRAŽ:

500 primjeraka.

#### ADRESA:

Trg slobode bb  
e-mail: kpktz.ba@bih.net.ba  
<http://www.kpktz.ba>

	Prvi master treneri za obuku mentora za praktičnu nastavu u TK	4
	Korak bliže praksi: Info dan o realizaciji praktične nastave	5
	Delegacija Istarske županije u Komori	6
	Predstavnici Austrijske ambasade u Komori	7
	Počinje izgradnja Kampusu Univerzitets u Tuzli	8
	Privrednim društvima u privatnom vlasništvu podržano 6 projekata energetske efikasnosti	9
	Podrška obrtnicima - "Siguran start"	10
	40 godina JP SKPC Mejdan d.o.o. Tuzla	10
	Gradonačelniku Lugaviću uručena Kruna izvrsnosti za doprinos razvoju privrede u Tuzli	11
	„Privreda TK“ na sajmovima u BiH	12 i 13
	„Privreda TK“ na sajmu namještaja u Beogradu	14
	Najava sajamskih manifestacija	15
	Ozvaničen početak rada MKD MI-BOSPO Tuzla	16
	„Fana“ kupac dionica „Majevice“	16
	Održan Tech Cruise na jezeru Modrac	17
	Lukavac Cement primjer dobre prakse	18
	Uspostavljanje jače saradnje sa turskim avio prijevoznicima	19



„Održivi ekonomski razvoj i promocija zapošljavanja u BiH“...

## Prvi master treneri za obuku mentora za praktičnu nastavu u TK

Obuka u trajanju od 120 sati



KANTONALNA PRIVREDNA KOMORA TUZLA  
CHAMBER OF ECONOMY OF TUZLA CANTON  
KANTONALE WIRTSCHAFTSKAMMER TUZLA

Nakon uspješno provedene obuke za master trenere, sedam učesnika iz Tuzlanskog kantona je uspješno položilo završni ispit i dobilo certifikat master trenera za obuku mentora praktične nastave. Ovo su prvi master treneri koji će u budućnosti provoditi obuke mentora praktične nastave kod poslovnih subjekata. Tokom obuke u trajanju od 120 sati, polaznici su stekli ključne didaktičke, metodološke i pedagoške kompetencije, kako bi uspješno planirali i provodili obuke za mentore na kompetentan i savremen način. Obuka za master trenere je realizovana u okviru programa „Održivi ekonomski razvoj i promocija zapošljavanja“ kojeg sufinansiraju Vlada SR Njemačke i Vlade Švicarske, a implementira GIZ.

U narednom periodu Pedagoški zavod Tuzlanskog kantona i Kantonalna privredna komora Tuzla će organizovati obuke za mentore praktične nastave u poslovnim subjektima. Mentor je učitelj na radnom mjestu, uzor učeniku, koji prenosi svoja znanja i vještine u realnom radnom okruženju. On je zadužen da na cjelovit način oblikuje procese učenja i organizira stručno obrazovanje u preduzeću, kako po pitanju njegovih sadržaja, tako i po pitanju metodološkog pristupa, na način da učenike osposobljava za rad u struci. Kroz obuku će mentori dobiti upute kako najbolje prenijeti svoja znanja i vještine, kako motivisati učenike i kako se postaviti u nekim neželjenim situacijama. Uvođenje elemenata dualno organizovanog obrazovanja u Tuzlanskom kantonu stiču se preduslovi za dobijanje konkurentnije radne snage koja će svojim znanjima i vještinama moći da odgovori na potrebe i zahtjeve privatnog sektora. Realizacijom ovih aktivnosti, cilj je osigurati kvalitetnu praktičnu nastavu, uključiti što veći broj poslovnih subjekata i obezbijediti da svaki učenik ima priliku učiti na savremenim mašinama, od najboljih majstora, sticati radne navike koje su značajne za formiranje kvalitetnog, mladog radnika. Uspješan završetak obuke za master trenere, naknadni praktični ispit i dodjela uvjerenja predstavlja važan doprinos razvoju kvalitete dualno organizovanog stručnog obrazovanja u BiH.



Unapređenje okvira za integraciju dualno organizovanog obrazovanja u Tuzlanskom kantonu“

## Korak bliže praksi: Info dan o realizaciji praktične nastave

Info dan u Komori



U Kantonalnoj privrednoj komori Tuzla, u okviru realizacije projekta „Unapređenje okvira za integraciju dualno organizovanog obrazovanja u Tuzlanskom kantonu“, održan je Info dan za realizaciju praktične nastave kod poslovnih subjekata na kojem su predstavljeni zakonski okvir za realizaciju praktične nastave, te program i priručnik za obuku mentora praktične nastave u poslovnim subjektima.

Cilj projekta je unapređenje saradnje škola za srednje stručno obrazovanje i obuku u poslovnim subjektima u Tuzlanskom kantonu i sistemski pristup za uvođenje elemenata dualno organizovanog obrazovanja, za šta je potrebna sinergija svih ključnih aktera uključujući Ministarstvo, Pedagoški zavod, stručne škole, kompanije i Komoru što na kraju treba rezultirati poboljšanjem zapošljivosti učenika nakon završene srednje škole. U pozdravnom obraćanju predsjednik Komore, Nedret Kikanović je istakao značaj saradnje privrede i obrazovanja, što se vidjelo i u velikom broju prisutnih. Istakao je značaj učenja na radnom mjestu, na najsvremenijim mašinama, uz mentore koji prenose svoja znanja i vještine. Predsjednik Kikanović se još jednom zahvalio na podršci koju je GIZ pružio prilikom realizacije projektnih aktivnosti, kao i finansierima, Vladi Njemačke i Vladi Švicarske. Direktor pedagoškog zavoda, Izet Numanović je naglasio značaj procesa koji su se pokrenuli u cilju unapređenja realizacije praktične nastave, ističući značaj kvaliteta koji se obezbjeđuje saradnjom škola i privrede, obukom mentora te mogućnost da učenici po završetku svog školovanja ostanu raditi upravo u firmama u kojima su obavljali praktičnu nastavu i sticali vještine i kompetencije, što je značajno i za privredne subjekte u kojima je sveprisutan problem nedostatka stručne radne snage.



Ministar obrazovanja i nauke TK, Ahmed Omerović je naglasio da je ovaj proces izuzetno bitan za Tuzlanski kanton kao jednu od najzanimljivijih ekonomskih regija naše zemlje i da obrazovanje mora biti aktivno uključeno u privredni razvoj i pratiti potrebe domaće privrede. Ministarstvo je i za ovu godinu osiguralo sredstva za osiguranje učenika, završene su obuke master mentora i u narednom periodu će započeti i obuka menotra u privrednim subjektima.

Kako je istakla projekt menadžerica, Edina Kurtić, cilj je upoznati sve aktere o uslovima i načinu realizacije praktične nastave i unaprijediti

saradnju između srednjih stručnih škola i poslovnih subjekata kako bi se učenicima omogućilo sticanje praktičnih znanja i vještina u realnim radnim uslovima, čime se povećava njihova konkurentnost na tržištu rada po završetku školovanja. Prisutnim predstavnicima škola i poslovnih subjekata predstavljeni su Izmjene i dopune Pravilnika o praktičnoj nastavi, Uputstvo za realizaciju praktične nastave u privrednim subjektima srednjih škola Tuzlanskog kantona i Program za obuku mentora praktične nastave, kojim su stvoreni zakonski preduslovi za sistemsko uređenje ove oblasti. Veliki broj prisutnih, kako iz obrazovanja tako i iz privrede, kroz pitanja i diskusiju razmijenili su iskustva, razriješili nejasnoće koje su imali te podijelili svoje uspješne primjere što bi trebalo podstaći i ostale poslovne subjekte da se aktivno uključe.

U okviru SEDEP programa GIZ pruža savjetodavnu i stručnu podršku unapređenju pravnog okvira za stručno obrazovanje partnerima u TK. Ena Kunić, savjetnica u GIZ-u, istakla je sljedeće: „Izmjenama i dopunama Pravilnika omogućena je sistemaska integracija mentora praktične nastave kod poslovnih subjekata, te je po prvi put u Bosni i Hercegovini kroz podzakonski akt u obrazovni sistem integrisan master mentor koji će podučavati mentore vještinama neophodnim za rad sa učenicima. Olakšano je regulisanje ugovornih odnosa povodom praktične nastave izvan škole kroz predviđanje obrazaca ugovora kojima će se regulisati sva prava i obaveze ugovornih strana, te u konačnici unaprijediti saradnja između dva mjesta učenja. Raduje nas što smo kroz savjetodavnu podršku doprinijeli poboljšanju pravnog okvira u TK.“



U narednom periodu Pedagoški zavod i Komora će započeti i prve obuke mentora praktične nastave kod poslovnih subjekata. Mentor je učitelj na radnom mjestu, uzor učeniku, koji prenosi svoja znanja i vještine u realnom radnom okruženju. On je zadužen da na cjelovit način oblikuje procese učenja i organizira stručno obrazovanje u preduzeću, kako po pitanju njegovih sadržaja, tako i po pitanju metodološkog pristupa, na način da učenike osposobljava za rad u struci. Kroz obuku će mentori dobiti upute kako najbolje prenijeti svoja znanja i vještine, kako motivisati učenike i kako se postaviti u nekim neželjenim situacijama.

Projekat koji Komora realizira na osnovu ugovora o lokalnoj subvenciji, provodi se u okviru programa „Održivi ekonomski razvoj i promocija zapošljavanja u Bosni i Hercegovini“ (SEDEP) čiji je cilj poboljšanje stanja zapošljavanja i jačanje privatnog sektora u Bosni i Hercegovini, sa fokusom na zelenu ekonomsku i digitalnu transformaciju. Projekat sufinansiraju Vlada SR Njemačke (BMZ) i Vlada Švicarske a provodi GIZ. Cilj projektnih komponente „Jačanje srednjeg stručnog obrazovanja i obuke“ (SVET) jeste jačanje sistema stručnog obrazovanja s fokusom na dualno organizovano stručno obrazovanje.

Edina Kurtić, rukovodilac Sektora udruženja



Posjeta Tuzli i Komori...

## Delegacija Istarske županije u Komori

Najrazvijenija hrvatska županija - Šampion turizma u Hrvatskoj -  
Mogućnosti saradnje u okviru sajamskih aktivnosti



U okviru posjete Gradu Tuzli, u posjeti Kantonalnoj privrednoj komori Tuzla boravili su predstavnici Istarske županije. Delegaciju iz najrazvijenije hrvatske županije činili su Boris Miletić župan Istarske županije i Ezio Pinzan pročelnik Upravnog odjela za poljoprivredu, šumarstvo, lovstvo, ribarstvo i vodno gospodarstvo Istarske županije. Goste je dočekaio Nedret Kikanović sa saradnicima i izrazio dobrodošlicu gostima iz dijela susjedne države sa kojim u posljednje vrijeme nije bila intenzivna saradnja. Predstavio je predsjednik Kikanović gostima aktivnosti Komore u Tuzli, Komorski sistem u BiH, pozicioniranje komora u Zakonu o komorama FBiH. Istaknuto je da Komora štiti interese svojih članica, promovise i predstavlja na sajamskim manifestacijama u BiH i regionu proizvode, usluge i aktivnosti firmi članica Komore.

**“Možemo se pohvaliti činjenicom da već niz godina sa velikim uspjehom predstavljamo naše članice na 15 do 20 sajamskih manifestacija u našoj zemlji i zemljama okruženja. Našu, već tradicionalnu sajamsku postavku pod nazivom “Privreda TK”, čini i do 45 firmi iz našeg članstva i redovno bilježimo njihovo zadovoljstvo našom organizacijom a ujedno i ostvarenim novim kontaktima, sklopljenim poslovima”,** naglasio je predsjednik Kikanović. Razgovaralo se još o spoljnotrgovinskoj razmjeni Tuzlanskog kantona sa Istarskom županijom, o strukturi privrede TK te o globalnom problemu nedostatku radne snage. **“Nismo mogli ni pomisliti da ćemo danas razgovarati o nedostatku radne snage kao velikom, možda i najvećem problemu naših privreda. Istarska županija kao šampion turizma u Hrvatskoj i najrazvijenija županija u Hrvatskoj posebno osjeti taj problem i u najvećoj mjeri ga rješava stranom radnom snagom kao uostalom i većina zemalja u okruženju u EU”,** istakao je župan Miletić.



Još je govorio o privredi županije sa akcentom na turističku djelatnost, o mogućnostima saradnje na raznim poljima posebno kada su u pitanju razmjene iskustava privrednika dvije regije u okviru sajamskih aktivnosti. Dogovoreno je da se u narednom periodu poduzmu aktivnosti na povezivanju dvije privrede te da se pokuša, uz pomoć Gradske uprave Tuzla, organizovati nastupe i posjete privrednika Tuzle i Tuzlanskog kantona sajamskim manifestacijama u Istri, kao što su Međunarodni sajam prehrane, pića i opreme za turizam “Promohotel” Poreč, Međunarodna izložba vina i vinarne opreme „Vinistra“ također u Poreču, Internacionalni sajam pršuta “Isap” Tinjan, Međunarodni sajam graditeljstva opremanja i uređenja “Promoah” Poreč, i drugi.

D.K.



Iz Komore...

## Predstavnici Austrijske ambasade u Komori

Organizacija Privredne misije „Plastika i metal“ u prostorijama Kantonalne privredne komore Tuzla kao i organizacija B2B susreta austrijskih i bosanskih privrednika



Početak avgusta je upriličena posjeta trgovinske savjetnice Austrijske ambasade u Bosni i Hercegovini Kantonalnoj privrednoj komori Tuzla. Uz Marthu Suda trgovinsku savjetnicu Austrijske ambasade u BiH i Nedreta Kikanovića predsjednika Komore, sastanku su prisustvovali i Damir Dervisefendić saradnik savjetnica Suda te Almir Mešić i Jasminka Berbić u ime Kantonalne privredne komore Tuzla. U uvodnom obraćanju, predsjednik Kantonalne privredne komore Tuzla izrazio je zahvalnost Austrijskoj ambasadi i naglasio dosadašnju dobru međusobnu saradnju. Savjetnica Martha Suda upozna je prisutne i o održanom sastanku sa gradonačelnikom i predstavnicima Gradske uprave Grada Tuzla, gdje je dogovorena mogućnost učešća predstavnika Grada Tuzla predstojećem poslovnom samitu regije Dunava, koji će se održati u Beču početkom novembra 2024. godine, s ciljem razmjene iskustava u oblastima tretmana otpadnih voda, recikliranja i cirkularne ekonomije. Tema razgovora bila je i mogućnost organizacije Privredne misije „Plastika i metal“ u prostorijama Kantonalne privredne komore Tuzla kao i organizacije B2B susreta austrijskih i bosanskih privrednika kojima bi domaćin bila Komora Tuzla, dogovoreno je ovom prilikom. Savjetnica Suda je naglasila da će aktivnosti biti pokrenute već u septembru, kada budu imali potvrde učešća minimalno 5 austrijskih firmi. Kako vlada velika zainteresovanost za pomenute susrete, noć prije B2B sastanaka biće organiziran prijem Austrijske ambasade, s ciljem umrežavanja i jačanja međusobne saradnje. Drugog dana Privredne misije, 19. oktobra 2024. biće organizovane i jutarnje posjete firmama iz metaloprerađivačke ili industrije plastike. Nedret Kikanović predsjednik Kantonalne privredne komore Tuzla je istakao spremnost i dugogodišnje iskustvo u organizaciji B2B susreta, te zadužio saradnike koji će kontaktirati i surađivati na organizaciji B2B susreta sa saradnicima iz Austrijske ambasade.

Iz Udruženja proizvođača mlijeka  
Tuzlanskog kantona...

## Održana 10. sjednica Odbora Udruženja proizvođača mlijeka TK

Zaključci su upućeni na razmatranje u  
Federalno ministarstvo poljoprivrede,  
vodoprivrede i šumarstva



Članovi Odbora Udruženja proizvođača mlijeka Tuzlanskog kantona pri Kantonalnoj privrednoj komori Tuzla, održali su 10. po redu sjednicu. Razgovaralo se o uvođenju VKB-a na farme sa 20 i više uslovnih muznih grla u proizvodnji mlijeka, učešću Udruženja na 13. Izložbi stočarstva Tuzlanskog kantona u Gračanici i o izmjenama federalnog Pravilnika o podrškama proizvodnji u toku proizvodne sezone. Nakon rasprava i prijedloga, članovi Odbora Udruženja proizvođača mlijeka Tuzlanskog kantona pri Kantonalnoj privrednoj komori Tuzla zaključili su da proizvođači mlijeka na području TK neće predati zahtjeve za dodjelu VKB-a, da se pristupi isaglašavanje stavova sa zahtjevima farmera Unsko-sanskog kantona kao i da proizvođači mlijeka TK daju prijedlog da se izmjene i dopune Pravilnika ne donose u toku proizvodne sezone, odnosno da izmjene Pravilnika prate primjeri, sugestije i informacije sa terena.

Zaključci su upućeni na razmatranje u Federalno ministarstvo poljoprivrede, vodoprivrede i šumarstva. Nakon toga iz resornog Ministarstva su obavijestili poljoprivredne proizvođače da Veterinarski kontrolni broj (VKB) neće biti uvjet za ostvarivanje novčanih podrški, te da će ministarstvo nastaviti insistirati na poštivanju zakonskih odredbi koje su u primjeni od 2010. godine, odnosno, 2012. godine, a koje su ranije usvojene s ciljem zaštite zdravlja životinja a time i ljudi.

D.K.



Iz Vlade Tuzlanskog kantona...

## Počinje izgradnja Kampusa Univerziteta u Tuzli

Položen kamen temeljac za izgradnju Kampusa Univerziteta u Tuzli



Polaganjem kamena temeljca za izgradnju prvog objekta, svečano je počela izgradnja Kampusa Univerziteta u Tuzli. Ovom svečanom činu i prvom konkretnom koraku koji mijenja izgled cijelog prostora, te Univerzitetu, gradu Tuzli, ali i cijelom Tuzlanskom kantonu donosi mnogo više u smislu kvaliteta visokog obrazovanja, osim predstavnika Univerziteta u Tuzli, Skupštine i Vlade Tuzlanskog kantona, prisustvovala su i brojne druge zvanice i predstavnici univerziteta iz okruženja.

„Danas je zaista veliki dan i oktobar 2024. godine treba biti upisan u historiju, ne samo našeg univerziteta, već i ovoga grada, kantona, pa i naše države. Krećemo sa izgradnjom prve građevine u Kampusu. Građevine u koju će biti smještena četiri fakulteta, ali to je tek početak našeg projekta. Mi gradimo ovdje akademski grad, koji će priuštiti našim i nastavniciima i studentima sve ono što je zapravo jedan univerzitet“, kazala je rektorica Univerziteta u Tuzli Nermin Hadžigrahić.

Značajnu podršku realizaciji ovog projekta i „vjetar u leđa“ Univerzitetu pružili su Vlada i Skupština Tuzlanskog kantona.

„Danas svjedočimo početku jednog generacijskog projekta. Nekada prije dvije i pol godine smo definisali mjeru „izrada projektne dokumentacije za Kampus“, odvojili 500.000 KM i od tada do danas smo bili svi, mislim i na Skupštinu i na Vladu Tuzlanskog kantona, naravno i na Univerzitet, bili smo odlučni da dođemo do ovog današnjeg dana, do ovog čina i želim reći da sam veoma sretan. Naravno potpuno smo svjesni da je ovo veliki „zalogaj“, da je ovo veliki projekat kojeg će vjerovatno morati nastaviti voditi i sastavi i sazivi institucija i Skupštine i Vlade i Univerziteta u budućnosti, ali vrlo je važno da smo taj prvi korak učinili. U ovom činu vidimo zapravo jedan veliki iskorak kada je u pitanju visoko obrazovanje na području Tuzlanskog kantona ali šire. Vidimo da rješavamo prije svega imovinski status Univerziteta, fakulteta. Činjenica je da njihov status nije u potpunosti riješen, da su naši fakulteti „podstanari“ u objektima, a s druge strane otvaramo velike mogućnosti internacionalizacije našeg univerziteta. Brojne su države koje imaju veliki broj

studenta, a da nemaju mjesta i prostora da studiraju. Mi ovim otvaramo vrata i tim studentima i pozivamo ih da dođu i studiraju na Univerzitetu u Tuzli“, kazao je premijer Halilagić akcentirajući da su Vlada i Skupština Tuzlanskog kantona obezbijedili ukupno 10,7 miliona KM za ovu prvu fazu izgradnje Kampusa, a u narednom periodu će se iznaći sredstva i za sve ostale faze realizacije ovog megaprojekta.

Nedavno potpisanim ugovorom predviđeno je da je rok za izgradnju prve građevine 16 mjeseci, a ministar obrazovanja i nauke Ahmed Omerović istaknuo je tri kveoma bitna aspekta današnjeg događaja.

„Prva stvar je da smo uspjeli da zaustavimo pesimizam. Pesimizam koji kaže da ne možemo praviti velike projekte. Mi, na ovaj način, pokazujemo da smo započeli veliki projekat, veliki projekat za kanton, veliki projekat za grad Tuzlu, veliki projekat za Bosnu i Hercegovinu i naša javnost će sada vjerovati da mi to možemo. Druga je stvar što pokazujemo mladim ljudima da mogu ostati u Bosni i Hercegovini i da ovdje postoji perspektiva, a treća stvar, možda i najvažnija, a to je da ćemo mi ovdje obrazovati ljude koji će budućnosti voditi i graditi Bosnu i Hercegovinu i koji će doprinijeti razvoju ove zemlje u svim sferama života“, zaključio je Omerović.

O značaju početka realizacije ovog projekta govorio je danas i predsjednik Skupštine Tuzlanskog kantona Žarko Vujović.

„Ovo je sigurno generacijski projekat, najznačajniji projekat kojeg je radio bilo koji saziv Skupštine i Vlade Tuzlanskog kantona od kako postoji Kanton. Ja sam izuzetno zadovoljan što je upravo ovoj generaciji političara, kako zakonodavne, tako i izvršne vlasti, pripala ta čast da prisustvuju početku izgradnje Kampusa. Bitno je započeo ovaj projekat i ovom prilikom želim se zahvaliti svim onima koji su učestvovali, koji učestvuju i koji će učestvovati u konačnoj realizaciji ovoga projekta“, rekao je predsjednik Vujović.

Svečanost je uveličala i rektorica Državnog univerziteta u Novom Pazaru Zana Dolićanin, te je izrazila zadovoljstvo i čast što je danas gost na postavljanju kamena temeljca za Kampus Univerziteta u Tuzli.

„Ovo je velika manifestacija i ovaj poduhvat će biti od velikog značaja ne samo za studente Univerziteta u Tuzli, već i za ceo region. Od univerziteta u Srbiji samo Univerzitet u Novom Sadu ima svoj Kampus, tako da svi mi koji vodimo neke visokoškolske institucije imamo želju da se ovako nešto dešava i u našem gradu“, kazala je rektorica Dolićanin te najavila da će ova posjeta tuzlanskom univerzitetu biti prilika i da sa rektoricom Hadžigrahić razgovara o zajedničkom studijskom programu bosanskog jezika koji bi se odvijao na Državnom univerzitetu u Novom Pazaru.



## Privrednim društvima u privatnom vlasništvu podržano 6 projekata energijske efikasnosti



Ministrica prostornog uređenja i zaštite okolice Anela Ajšić zaključila je ugovore sa 6 privrednih društava u privatnom vlasništvu koja su ispunila sve uslove javnog konkursa. Ovim resomo ministarstvo i Vlada TK nastavljaju izdvajati sredstva za projekte energijske efikasnosti (izgradnju solarnih elektrana, termoizolaciju zidova) i projekte upravljanja otpadom za privatne poduzetnike koji obavljaju djelatnost i realiziraju projekte na području Tuzlanskog kantona. Privrednom društvu EMINAL d.o.o. Živinice za ugradnju fotonaponske elektrane Eminal 2 dodijeljeno je 28.500 KM dok će IMEL d.o.o. Lukavac za projekat Solarna energija za održivost poslovanja dobiti 28.500 KM. Za projekat „Priroda i energetska efikasnost“ privrednom društvu MILO SELO d.o.o. Lukavac dodijeljeno je 27.500 KM a TEMPO PLAST d.o.o. Srebrenik će za izgradnju bokseva i kontejnera za odvajanje i reciklažu otpada nastalog u procesu proizvodnje PVC i ALU stolarije dobiti 28.000 KM. Namjenska sredstva od ekoloških naknada pripala su i preduzeću KAKEŠ d.o.o. Živinice za projekat oblaganja vanjskih zidova na poslovnom objektu KAKEŠ d.o.o. na Strašnju u visini od 29.000 KM dok je za solarnu elektranu 27.000 KM dodijeljeno privrednom društvu u privatnom vlasništvu PUPEX d.o.o. Tuzla. Iz ovogodišnje raspodjele isključeni su poduzetnici koji su podržani prošle godine, čime se želi omogućiti pristup sredstvima svim privrednim društvima u privatnom vlasništvu na području TK.

## U Ministarstvu privrede Tuzlanskog kantona održan sastanak sa predstavnicima zajedničkog projekta UNFPA i Češke ambasade u Bosni i Hercegovini



Ministar privrede Edin Duraković, održao je sastanak sa predstavnicama zajedničkog projekta UNFPA u Bosni i Hercegovini i Češke ambasade u Bosni i Hercegovini, te je tom prilikom razgovarano o potencijalnoj saradnji Ministarstva privrede Tuzlanskog kantona sa navedenim projektom. Na sastanku je razgovarano o analizi efekata demografskih trendova na pružanje javnih usluga u Bosni i Hercegovini, koju su UNFPA i Češka ambasada sproveli u 2022. godini, a koje ukazuju na značajne izazove, uključujući smanjenje broja stanovnika za više od pola do 2070. godine, kao i

predviđanja da će starija populacija biti najzastupljenija grupa u Bosni i Hercegovini. Shodno navedenom, ekonomske projekcije pokazuju da će do 2030. godine biti potrebno dodatnih 3% BDP-a godišnje za održavanje trenutnog nivoa javnih usluga, te je shodno tome potrebno inicirati dodatne aktivnosti i napore kako bi se na adekvatan način odgovorilo na identificirane izazove. U skladu sa navedenim, UNFPA u Bosni i Hercegovini i Češka ambasade u Bosni i Hercegovini pokrenuli su projekat razvoja modela zapošljavanja za žene sa fokusom na dugotrajno nezaposlene ili neaktivne žene na tržištu rada. U okviru projekta se trenutno radi na izradi studije izvodljivosti i potreba tržišta, a kako bi se definirao potencijal udruženja žena za proizvodnju robe ili pružanje usluga na tržištu. Ključni cilj navedene studije jeste evaluacija ekonomske izvodljivosti predloženih aktivnosti i projekata udruženja žena, identifikacija potencijalnih izazova i rizika, te istraživanje mogućih partnerstava s privatnim sektorom, o čemu je razgovarano i sa predstavnicima Ministarstva privrede Tuzlanskog kantona. Poseban fokus bio je na kapacitetima i resursima sa kojima Tuzlanski kanton raspolaže, identifikaciju potencijalnih privrednih grana u kojima bi investicija bile opravdane, te mogućnostima podrške u cilju dugoročne održivosti podržanih projekata.

D.K.



## Iz Gradske uprave Tuzla... Podrška obrtnicima - “Siguran start”

Grad Tuzla kroz projekat “Siguran start” podržao 205 obrtnika u prvoj i drugoj godini poslovanja



U Tuzli je upriličeno potpisivanje ugovora sa korisnicima novčane podrške u okviru projekta “Siguran start” za 2024. godinu. Ovaj projekat, koji Grad Tuzla uspješno realizuje već niz godina, ima za cilj podržati novoregistrovane subjekte u prvim godinama poslovanja. Zijad Lugavić gradonačelnik Tuzle ističući važnost ovog projekta za ekonomski razvoj grada, kazao je: “Ove godine smo kroz projekat “Siguran start” podržali 205 obrtnika u prvoj i drugoj godini rada, čime još jednom potvrđujemo opredijeljenost Gradske uprave da smo partneri novoregistrovanim obrtima. Važno je naglasiti da nije neizvjesna samo prva godina poslovanja, već i druga, zbog čega smo prije dvije godine promijenili pravilnik i proširili podršku i na privredne subjekte u drugoj godini rada. Naš cilj je da zajedno prevaziđemo izazove početka poslovanja i izgradimo snažniju privredu grada Tuzle i Bosne i Hercegovine.”

Iz Budžeta Grada Tuzle za 2024. godinu, sredstva su raspoređena na 93 korisnika koji su djelatnost registrovali u 2023. godini, te na 112 korisnika za subjekte koji su djelatnost registrovali u 2024. godini, čime je ukupno podržano 205 obrtnika sa iznosom od 335.000,00 KM.

Kroz projekat “Siguran start” Grad Tuzla nastavlja pružati podršku obrtnicima u cilju stvaranja novih radnih mjesta, povećanja proizvodnje i jačanja ekonomskog razvoja lokalne zajednice.

## 40 godina JP SKPC Mejdan d.o.o. Tuzla

Gradonačelnik Lugavić istakao značaj podrške Grada Tuzle sportskom centru Mejdan na obilježavanju 40 godina postojanja i uspješnog rada



JP SKPC Mejdan d.o.o. Tuzla je na svečan način obilježio 40 godina postojanja i uspješnog rada. Ceremoniji su prisustvovali brojni gosti iz sportskog, kulturnog i privrednog života Tuzle i Tuzlanskog kantona, koji su svojim prisustvom uveličali ovaj značajan jubilej. Zijad Lugavić gradonačelnik Tuzle ističući značaj Mejdana za razvoj sporta i kulture u Tuzli, izrazio je zadovoljstvo dosadašnjim rezultatima i podsjetio na podršku koju Grad Tuzla kontinuirano pruža ovom hramu sporta. „Velika mi je čast i zadovoljstvo da svim građankama i građanima Tuzle, menadžmentu i zaposlenicima Sportskog centra Mejdan, kao i svim sportskim klubovima koji koriste njegove usluge, čestitam 40 godina uspješnog rada. Kao dijete, pohađao sam školu Mosnik, tada nazvanu Muharem Merdžić, i bio sam svjedok izgradnje ovog našeg sportskog centra. Otvaranje 1984. godine bilo je veliki događaj za naš grad. Mejdan je tada bio grandiozan objekat, no s vremenom se, kao i svaka druga građevina, trošio“, kazao je gradonačelnik Lugavić. Također, gradonačelnik Lugavić je istaknuo kako su u posljednjih nekoliko godina uložena značajna sredstva u obnovu velike i male sale, kao i ostalih sadržaja, čime se Mejdan polako vraća u prvobitni sjaj. „Grad Tuzla je već dokazao svoju posvećenost, izdvajajući oko 3% budžeta za sport, a nadamo se da će i drugi nivoi vlasti, posebno federalni i kantonalni, slijediti naš primjer“, kazao je gradonačelnik Lugavić, naglašavajući važnost unapređenja sportskih uslova za mlade naraštaje. JP SKPC Mejdan d.o.o. Tuzla otvoren je 2. oktobra 1984. godine, na dan kada Tuzla obilježava Dan oslobođenja. Te iste godine, grad je bio domaćin XIV Zimskih olimpijskih igara, čime je započela jedna nova sportska era. Tuzla je postala dom sportskih talenata, a Mejdan je ubrzo postao zaštitni znak grada. Kroz četiri decenije postojanja, ovaj sportski centar je realizovao preko 350 sportskih i kulturnih događaja godišnje, sa više od 350.000 posjetilaca. Mejdan nije samo sportski centar, već je simbol Tuzle, mjesto okupljanja, razvoja i unapređenja sporta, kulture i privrede. Tokom 40 godina postojanja, Mejdan je ostao omiljeno okupljalište Tuzlaka, simbolizirajući sve ono što je najbolje u duhu ovog grada.



## Gradonačelnik Lugavić podržava izgradnju fotonaponske elektrane kao projekat obnovljivih izvora energije

Sastanak sa resornim ministrom i direktorom Elektroprivrede



U Gradskoj upravi Tuzle, Zijad Lugavić gradonačelnik je održao sastanak s federalnim ministrom energije, rudarstva i industrije, Vedranom Lakićem, predstavnicima JP Elektroprivrede BiH, direktorom Sanelom Buljubašićem i izvršnim direktorom za kapitalne investicije, Harunom Gadžom. Razgovarali su o projektu JP Elektroprivrede BiH, izgradnji fotonaponske elektrane Divkovići 1 i 2, na napuštenom rudarskom zemljištu i završenom odlagalištu šljake i pepela Termoelektrane Tuzla. Gradonačelnik Lugavić naglasio je važnost transformacije lokaliteta koji su ranije korišteni za proizvodnju električne energije iz uglja, u lokacije za proizvodnju električne energije iz obnovljivih izvora, ističući: „Grad Tuzla podržava inicijative koje promovisu obnovljive izvore energije, zelenu tranziciju, smanjuju zagađenje i jačaju održivost, čime će se poboljšati kvalitet života naših građana.“ Ministar Lakić je pojasnio da će ovim projektom, lokacije koje su prethodno korištene za proizvodnju električne energije iz uglja bit transformisane u površine za generisanje

električne energije iz obnovljivih izvora, posebno na degradiranim područjima bivših rudarskih kopova koja se ne mogu koristiti za poljoprivredu. Postojeća infrastruktura u ugljenom regionu Tuzle može se iskoristiti za izgradnju i priključenje energetskih kapaciteta, čime će se postepeno zamijeniti proizvodni objekti koji koriste ugalj, ističući da će gradnja fotonaponskih elektrana i sistema za skladištenje električne energije osigurati stabilno snabdijevanje električnom energijom za region Tuzle. Direktor EP BiH, Buljubašić, istaknuo je da je iniciranje energetskih projekata na bivšim rudarskim površinama preporučeno posebnim zaključkom Vlade Federacije BiH, u okviru Projekta pravedne tranzicije ugljenih regiona, koji se priprema uz podršku Svjetske banke. Također je naglasio da su u Elektroprivredi BiH započete aktivnosti na optimizaciji instalacije baterijskih sistema za pohranu električne energije (BESS). Degradirane površine bivših rudarskih kopova i područje TE Tuzla predstavljaju potencijalne lokacije za realizaciju ovih projekata.

## Gradonačelniku Lugaviću uručena Kruna izvrsnosti za doprinos razvoju privrede u Tuzli

U okviru projekta “Pouzdanost” održan VI B2B Klub pouzdanih

U okviru projekta “Pouzdanost” u Međunarodnoj galeriji portreta u Tuzli održan je VI B2B Klub pouzdanih, s privrednim susretom i panel diskusijom na temu “Klijenti u fokusu – Strategije za izgradnju dugoročnih odnosa”. Centralni dio događaja bila je dodjela prestižne nagrade LRC-ove Krune izvrsnosti gradonačelniku Tuzle, dr. sc. Zijadu Lugaviću, kao priznanje za izuzetan doprinos razvoju privrede u Tuzli. Gradonačelnik Lugavić zahvaljujući se, naglasio je značaj umrežavanja privrednih subjekata i jačanja privrede grada: “Ovo je još jedan pokazatelj da Gradska uprava Tuzle ide u pravom smjeru u podršci razvoju privrede na području grada. Umrežavanje privrednih subjekata, posebno u realnom sektoru, ključno je za stvaranje društva i ambijenta koji omogućavaju brži i kvalitetniji privredni razvoj, kao i razvoj drugih segmenata društva. B2B susreti igraju važnu ulogu u povezivanju učesnika, razmjeni iskustava i prezentaciji novih trendova u različitim oblastima poslovanja.”

LRC Grupacija je prepoznala značajan napredak Grada Tuzle pod vodstvom gradonačelnika Lugavića, uručivši mu nagradu “Kruna razvoja privrede”. Ovo priznanje potvrđuje da je Grad Tuzla ispunio kriterije projekta “Gradovi, općine/opštine, biznis” u kategoriji velikih gradova, s posebnim naglaskom na rast prihoda, dobiti, broja zaposlenih i kompanija. Gradonačelnik Lugavić, istaknuo je važnost ulaganja u privredni razvoj, naglašavajući da Grad Tuzla bilježi značajan rast, s povećanjem



broja registrovanih privrednih subjekata i podrškom, posebno za male obrte, mlade i žene u poduzetništvu. Naveo je da podaci pokazuju rast zaposlenosti, smanjenje nezaposlenosti i prosječnu plaću od 1.335 KM, iznad kantonalnog i federalnog prosjeka. Gradonačelnik je istaknuo i značaj aerodroma Tuzla za dalji razvoj i uključivanje dijaspore. Pozvao je privrednike da podijele svoje ideje za dalji razvoj grada, kako bi Tuzla postala još snažnija, inkluzivnija i ekonomski stabilnija. Događaj, koji je organizovala LRC Grupacija Sarajevo, okupio je privredne subjekte i stručnjake, te je još jednom potvrđena važnost Tuzle kao privrednog centra. Grad Tuzla nastavit će raditi na daljem unapređenju poslovne klime i podršci lokalnim privrednicima.

D.K.



Sajamske aktivnosti...

## “Privreda TK” na sajmu u Gradačcu

51. međunarodni sajam šljive



U Gradačcu je održan 51. Međunarodni sajam poljoprivrede i prehrambene industrije - Sajam šljive na kome se, na oko pet hiljada metara kvadratnih, predstavilo više od 300 izlagača iz Bosne i Hercegovine, zemalja regiona, Njemačke i Turske. Organizator te tradicionalne sajamske manifestacije bila je Turistička zajednica grada Gradačca, uz podršku Grada Gradačca i brojnih partnera i sponzora.

“Veoma smo zadovoljni jer sve planirane aktivnosti su realizovane. Posebno ističem stručna i naučna predavanja koja su bila veoma sadržajna i nadam se korisna za sve učesnike. Gradačac je krajem augusta ponovo bio centar privrednih, naučnih, turističkih i kulturnih zbivanja u regionu. Imali smo brojne goste iz zemlje i inostranstva. Očekujemo uspostavljenije saradnje lokalnih uprava Gradačca i njemačkog grada Karlsruhe. Zahvaljujem se izlagačima, pokroviteljima,

sponsorima i poslovnim partnerima bez čije podrške ne bi smo mogli organizovati ovaj privredno-turistički događaj u našem gradu” rekao je Amir Pašalić, voditelj Turističkog ureda u Gradačcu. Na Sajmu šljive prevladavale su kolektivne izložbe, a na štandovima su se predstavile renomirane kompanije u oblasti proizvodnje i prerade hrane, zaštitnih sredstava, mehanizacije i opreme, institucije i organizacije koje podržavaju razvoj agrara te bankrski sektor. Grad Srebrenik, Opština Modriča, Općina Doboj-Istok, Kanton Sarajevo - Udruženje domaćih proizvođača i prodavača domaćih proizvoda “Naše avlije” Sarajevo, Udruženje poslodavaca Brčko distrikta BiH, Kantonalna privredna komora TK, Privredna komora USK, Turistička zajednica TK i brojna udruženja građana imali su priliku da predstave proizvode lokalnih proizvođača i prerađivača. Na privrednim i naučno-stručnim skupovima istaknuta je važnost transfera znanja, inovacija i istraživanja u oblasti poljoprivrede, stvaranja mogućnosti konkurentnosti naših poljoprivrednika na inostranom tržištu. Govoreno je o klimatskim promjenama, komparativnim prednostima korištenja autohtonog voća, modernim pristupima u zaštiti šljive, zakonskim regulativama, prezentovana su nova tehnološka dostignuća u oblasti poljoprivrede. Vrijedi istaći da je ove godine u Gradačcu otkupljeno 3.000 tona šljive koja je izvezena na inostrano tržište ili za industrijsku preradu. Na tradicionalnoj “Plavoj noći” uručene su zahvalnice otkupljivačima šljive sa područja Gradačca. Zahvalnice su uručene firmama: Bečejac, VIP-Sema, Agro Mujčinović, Mat-Trade, PMG VIP i Maočanka. Ove godine za posjetoce je organizovan sadržajan kulturno-zabavni program, promocije, izložbe i koncerti.

## “Privreda TK” na sajmu “EKOBIS” u Bihaću

20. međunarodni sajam ekologije - 180 izlagača iz pet zemalja



U Sportskoj dvorani Luke u Bihaću održan je 20. međunarodni sajam ekologije - EKOBIS 2024. Ceremoniju svečano otvaranje su predvodili Kemal Hrnjić federalni ministar poljoprivrede, vodoprivrede i šumarstva, Nijaz Hušić premijer Unsko-sanskog kantona, Elvedin Sedić gradonačelnik Bihaća i Armin Kardašević ministar privrede Unsko-sanskog kantona. EKOBIS je prvi put organizovan 2003. godine kao inovativni projekat zasnovan na principima održivog razvoja i odgovornog korištenja prirodnih resursa. Ciljevi sajma uključuju promociju inovativnih proizvoda, tehnologija, malih obrta, turizma te regionalnu saradnju. Sanela Sabljaković, predsjednica Privredne komore Unsko-sanskog kantona, istaknula je kako je EKOBIS tokom svojih

20 godina postao simbol grada Bihaća, ali i regije, okupljajući ove godine preko 180 izlagača iz pet zemalja, na 85 štandova. Ukupno je, kroz prethodne sajmove, učestvovalo više od 4.000 izlagača iz 18 zemalja, a sajam je privukao preko 280.000 posjetitelja. Gradonačelnik Bihaća Elvedin Sedić uputio je riječi dobrodošlice svim izlagačima i gostima, naglašavajući značaj sajma za promociju turističkih potencijala Bihaća. Pozvao je prisutne da ostanu duže i podrže lokalne privrednike. Premijer Unsko-sanskog kantona Nijaz Hušić naglasio je da sajmovi više nisu samo prilika za kupovinu i prodaju, već predstavljaju platformu za promociju inovacija i održivog razvoja. EKOBIS ima potencijal da postane vodeći događaj u promociji zaštite okoliša, obnovljivih izvora energije i strateškog razvoja kantona. Jubilarni 20. međunarodni sajam ekologije - EKOBIS 2024 održane je od 5. do 8. septembra na lokaciji Sportske dvorane “Luke” u Bihaću. U okviru sajma EKOBIS 2024 održan je i 3. međunarodni sajam turizma - EKOTOUR, te 4. međunarodni sajam obrta. Ovogodišnji sajam pratio je teme zelene tranzicije, tehnologija i energije i nosio je moto “Zajedno bojimo budućnost”. Generalni sponzor sajma bili su Vlada Unsko-sanskog kantona i Ministarstvo privrede Unsko-sanskog kantona, a suorganizator Grad Bihać. Podrška sajmu bili su Ministarstvo vanjske trgovine i ekonomskih odnosa BiH, Federalno ministarstvo poljoprivrede, vodoprivrede i šumarstva, Agencija za vodno područje rijeke Save, Vanjskotrgovinska/Spoljnotrgovinska komora BiH i Privredna/Gospodarska komora FBiH.



## “Privreda TK” na sajmu u Modriči

13. sajam privrede u Modriči



“Sajam privrede Modriča 2024” otvorili su vicepredsjednik Kinesko-evropske asocijacije za tehnološku i ekonomsku saradnju Džao Sjaofang i načelnik modričke opštine Jovica Radulović, a svoje proizvode i usluge predstavilo je ove godine oko 150 privrednika i organizacija iz BiH, Hrvatske, Srbije i Kine. Radulović je rekao da je zadovoljan organizacijom manifestacije, koju Opštinska razvojna agencija Modriče organizuje trinaesti put uz podršku opštinske

uprave. “Nakon pandemije virusa korona nastavili smo sa održavanjem sajma, koji je prešao granice BiH, ali i Evrope”, rekao je Radulović otvarajući manifestaciju. On je istakao zadovoljstvo nastavkom partnerstva sa Ambasadom Kine u BiH koja je, nakon prošlogodišnjeg generalnog pokroviteljstva sajmu, i ove godine pružila značajnu pomoć u organizaciji ove privredne manifestacije. Radulović je rekao da privrednici na sajmu pokazuju da privreda u ovoj opštini nije zamrla. “Moramo posebnu pažnju posvetiti privredi, naročito sada kada iz BiH, pa i ovog prostora veliki broj građana odlazi u inostranstvo”, rekao je Radulović. Direktor Razvojne agencije opštine Modriča Snježana Vujić rekla je da se sajmodržava u sportskoh hali na 1.000 metara kvadratnih zatvorenog izložbenog prostora, sa 150 izlagača, i na 5.000 metara kvadratnih prostora na otvorenom, gdje su bili izloženi proizvodi seoskog preduzetništva i izložba automobila. Otvaranju sajma prisustvovali su predstavnici političkog i javnog života. Sajam privrede u Modriči organizuje se od 2010. godine i predstavlja najvažniju privrednu manifestaciju, koja ima tendenciju stalnog razvoja i prerastanja u tradiciju. Organizatori sajma su Razvojna agencija opštine Modriča i Sajam privrede Modriča.

## “Privreda TK” na sajmu u Tešnju

18. Međunarodni sajam privrede Tešanj 2024



U organizaciji Udruženja privrednika Biznis centar Jelah, Tešanj održan je 18. Međunarodni sajam privrede Tešanj. Ove godine je ova značajna sajamska manifestacija, trenutno vodeća u

Bosni i Hercegovini, okupila više od 611 izlagača iz Bosne i Hercegovine, zemalja regiona i šire. Sajam je održan na prostoru koji obuhvata 25.000 kvadrata na lokalitetu Kamelia d.o.o. – Matuzići općina Doboj Jug. Učesnicima je na raspolaganju i ove godine bio dostupan unutrašnji i vanjski izložbeni prostor za afirmativnu prezentaciju kompanija, njihovih proizvoda i usluga, na privrednom prostoru koji je nosilac ekonomskog razvoja u Bosni i Hercegovini. Prepoznajući značaj i važnost, kao i usklađivanje sa novim vremenom, fokus ovogodišnjeg Sajma je upravo na biznisu budućnosti koji mijenja cjelokupnu energetska sliku, smanjuje troškove, osigurava samoodrživost, pospješuje cjelokupan ekonomski razvoj i pristup politikama Evropske unije. Centralna tema 18. izdanja privrednog Sajma bila je “Emisije ugljenika u izvoznim proizvodima iz BiH”. Ove godine, zemlja partner Sajma bila je Indonezija, a grad partner Cazin. “Mi u Tešnju znamo šta radimo i kuda idemo u javnom i u privatnom sektoru. Znamo šta su nam naredni koraci i znamo šta očekujemo od drugih. Danas smo ovdje da pokažemo bolju i uspješniju Bosnu i Hercegovinu”, kazao je u obraćanju na svečanom otvaranju Sajma, Suad Huskić načelnik općine Tešanj.

### „Privreda TK“

Značajan broj firmi članica Kantonalne privredne komore Tuzla sačinjava zajedničku izložbenu postavku pod nazivom “Privreda TK”. Na sajmovima u Gradačcu, Modriči, Bihaću i Tešnju svoje usluge i proizvode predstavili su:

„Fana“ Srebrenik, „Mlin Nezić“ Gradačac, „Solana“ Tuzla, „TQM“ Lukavac, „Lović & Co“ Lukavac, „Imel – Milo selo“ Lukavac, „Eko život“ Tuzla, „Finra“ Tuzla, Hotel “Tehograd” Tuzla, Hotel “Vertigos” Tuzla, “Borplastika” Tuzla, “Radius Gračanica”, “Corn flips” Srebrenik, “Cydonia” Gračanica, Turistička agencija “Golden tours” Tuzla, Turistička agencija “Transturist” Tuzla, Turistička zajednica TK, Turistička zajednica Grada Tuzla, “Piemonte” Tuzla, “Lerim” Lukavac, “Aronija Okanović” Tuzla, “Adriatic osiguranje” Tuzla, “Euroherz osiguranje” Tuzla, “Triglav osiguranje” Tuzla, “Pašnjak” Tuzla, “Nova Banka” Banjaluka PJ Tuzla, “Annoa” Tuzla, “Azos” doo Tuzla, “MiBospo” Tuzla, “Porta Naturae” d.o.o. Srebrenik, JKP “Pannonica” d.o.o. Tuzla, UR Etno Restoran “Bardak” Đurđevik, Grupacija pčelara TK, Grupacija gljivara TK, “Alpha smart energy” Tuzla, “Grin” Gračanica, “MamaMia” Tuzla, “Kupres Milch” Kupres, “Aktivus” UG Tuzla, “Senad od Bosne” Lukavac, “Guber” Tuzla, “Cofi” Kalesija, “Terme Ozren” Grarčanica, OR “Api riznica” Živinice.

Pripremio: Dino Kalesić



Održan jubilarni 60. Sajam namještaja...

## „Privreda TK“ na sajmu namještaja u Beogradu

Najveća manifestacija regiona jugoistočne Evrope



Na Beogradskom sajmu su održani 60. Međunarodni sajam namještaja, opreme i unutrašnje dekoracije (UFI) i 60. izdanje Međunarodnog sajma mašina i alata za drvenu industriju (UFI). Najveća je ovo manifestacija regiona jugoistočne Evrope, koja već decenijama postavlja standarde i predstavlja najnovije tendencije, stilove i tehnologije u obradi drveta, proizvodnji i distribuciji namještaja. Jubilarno izdanje manifestacije otvorila je ministarka privrede u Vladi Republike Srbije Adrijana Mesarović.

Kao vodeća sajamna manifestacija u industriji nameštaja i pridruženim privrednim granama već šest decenija predstavlja regionalno središte za sajamsku promociju i razvoj domaćih i međunarodnih brendova i pruža reprezentativan uvid u najnovije trendove, inovacije, dizajn i napredne tehnologije u ovoj značajnoj privrednoj delatnosti.

Konceptijski oslonac Sajma nameštaja je i promocija dizajna nameštaja i umetnika - dizajnera, čija prisutnost i angažman donose dodatnu vrednost događaju i doprinose celokupnom iskustvu posetilaca. Predstavljajući nove dizajnerske linije, koncepte i ideje za nameštaj i enterijer, u programima kao što su Design Talks i Izložba mladih dizajnera, oni unose preko potrebni duh inovativnosti i kreativnosti i izvor su inspiracije za posetioce kako da urede svoje prostore.

Domaći i strani izlagači, renomirani proizvođači namještaja, dizajneri, distributeri, trgovci i drugi profesionalci, predstavili su širok spektar namještaja za različite prostorije i namjene (stambeni, kancelarijski, dječji, baštenski, kuhinje, spavaće sobe, garniture i još mnogo toga), različite stilove namještaja (moderne, klasične, minimalističke, rustične). Nisu izostali ni drugi elementi enterijera, kao što su rasvjeta, dekorativni predmeti i ostali dodaci koji doprinose kompletnom izgledu i opremanju stambenog ili poslovnog prostora.

Sajam namještaja održavao se u halama 1, 1A, 2, 3 i 3A i predstavilo se ove godine više od 100 izlagača iz Srbije i inostranstva. 60. Međunarodni sajam mašina i alata za drvenu industriju održavao se u hali 5 Beogradskog sajma od 1. do 5. oktobra i trajao je dan kraće od Sajma nameštaja. Ponudom je ispraćen jedan od glavnih ciljeva u oblasti razvoja obrade drveta - automatizacija i digitalizacija proizvodnih procesa, tehnologija koje omogućavaju proizvođačima da smanje troškove, povećaju efikasnost i poboljšaju kvalitet proizvoda. Izložbeni program obuhvatao je širok spektar mašina i alata za visoku preciznost primarne i završne obrade drveta, pilane, sušare, mehaničke, električne i pneumatske alate, kao i paletu repromaterijala za izradu namještaja.



Sajam je kao i prethodnih 59 godina, bio prilika za poslovne susrete i sklapanje novih partnerstava, ujedno i platforma za razmjenu znanja, ideja i inovacija. Održavanje sajma u šest decenija svjedoči o posvećenosti njegovanju estetskog i funkcionalnog doživljaja u opremanju ambijenta u kome boravimo, radimo i živimo.

Sajam namještaja u Beogradu, kao prvorazredni događaj u sferi proizvodnje i distribucije nameštaja u jugoistočnoj Evropi, svoju višedecenijsku poziciju uzora u ovoj djelatnosti potvrdio je i ove godine u jubilarnom izdanju, strateškim pristupom u organizaciji, kvalitetom ponude i učešćem u savremenim tokovima ove industrijske oblasti.

I ove godine je među izlagačima Kantonalna privredna komora Tuzla sa zajedničkom postavkom "Privreda TK", proširenom firmama iz cijele BiH.

D.K.



Najava sajamskih manifestacija...

## Sarajevo: „10. Sajam bh privrede“, 28.11 - 1.12.

U terminu od 28.11. do 1.12. 2024. godine



Zadovoljstvo je obavijestiti Vas da KJP Centar „Skenderija“ d.o.o. – Sarajevski sajam, u terminu od 28.11. do 1.12. 2024. godine organizuje „10. Sajam bosansko - hercegovačke privrede“. Organizacijom sajma Centar „Skenderija“ – Sarajevski sajam snažno podstiče privredni razvoj pod motom „Domaći proizvod u službi građana Bosne i Hercegovine“. Organizacijom Sajma i osmišljenim promotivnim aktivnostima nudimo priliku izlagačima da prikažu najnovija domaća i regionalna tehnološka i kreativna dostignuća. Prilika je to za promociju pozitivnog odnosa prema poduzetništvu, poticanje međusobne saradnje, upoznavanje stručne i druge javnosti s mogućnostima ulaganjima i poticajnim mjerama.

Prijava izlaganja, informacije o cijeni zakupa i sve dodatne informacije i sugestije na:

**KJP Centar „Skenderija“ d.o.o.**  
**Sarajevski sajam**  
**Menadžer sajma**  
**Bojčić Amira, dipl.ecc.**  
**+387 33 219 624**  
**www.skenderija.ba**

U očekivanju pozitivnog odgovora primite izraze iskrenog poštovanja!

## Beograd: 18. Sajam etno hrane i pića, 5-8.12.

Sajam će biti održan od 5. do 8. decembra 2024. godine



05-08. децембар

Покровитељи:



Regionalna smotra prehrambenih proizvoda namjenjenih tržištu, pripremljenih po tradicionalnim receptima, na tradicionalni način, Sajam etno hrane i pića, biće održan po 18. put u Beogradu. Najstarija je to i najkompletnija smotra proizvoda i proizvođača tradicionalnih prehrambenih proizvoda u Srbiji i regionu Jugoistočne Evrope. Riječ je o nacionalnim specijalitetima, proizvodima karakterističnim za uža geografska područja, najčešće ručne izrade i od organski gajenih sirovina. Manifestacija afirmiše tradicionalne proizvode kao prvorazredne tržišne i izvozne artikle, koji treba da postanu i nezaobilazni element turističke ponude. Radi se o proizvodima sa zaštićenim geografskim porijeklom ili onima čija se zaštita preporučuje. Cilj je utemeljenje robne marke etno proizvoda, odnosno

brandiranje tradicionalnih proizvoda. Sajam će biti održan od 5. do 8. decembra 2024. godine. Organizator je Beogradski sajam. Pokrovitelji sajma su Ministarstvo poljoprivrede, šumarstva i vodoprivrede RS i Grad Beograd.

**Za sve dodatne informacije: tel: +381 11 2655-317, 2655-521, 2655-329, e-mail: etnohrana@sajam.rs.**

**Više informacija i PRIJAVA NA <https://sajam.rs/kalendar-2024/sajam-etno-hrane-i-pica/>**

Kontakt osobe Ljiljana Šoškić koordinator projekta i Aleksandra Milosavljević saradnik na projektu.

D.K.





Iz firmi članica Komore...

## Ozvaničen početak rada MKD MI-BOSPO Tuzla



MI-BOSPO je svečano ozvaničio osnivanje mikrokreditnog društva MKD MI-BOSPO, koje će dodatno unaprijediti kvalitet kreditnih usluga i podršku lokalnom poduzetništvu. Gradonačelnik Tuzle, dr. sc. Zijad Lugavić, istakao je važnost ovog projekta za grad: **"Mikrokreditne organizacije igraju ključnu ulogu u razvoju svakog društva. Osnivanje mikrokreditnog društva dodatno će unaprijediti kvalitet usluga, s posebnim fokusom na žensko poduzetništvo, mlade, te projekte energetske efikasnosti, što su i prioriteti Grada Tuzle. Siguran sam da će uz podršku MI-BOSPO-a proces izgradnje kvalitetnijeg društva i povoljnijeg ambijenta za razvoj privrede i poduzetništva biti ubrzan."**

Na ceremoniji, koja je okupila zvanice, poslovne partnere, klijente i prijatelje MI-BOSPO-a, direktorica MKD MI-BOSPO, Sandra Bećirović, izrazila je zahvalnost prisutnima na podršci i povjerenju. Naglasila je posvećenost novog mikrokreditnog društva pružanju kvalitetnih kreditnih usluga stanovništvu i poslovnim subjektima, s posebnim akcentom na jačanje lokalne zajednice. Safet Husić direktor MKF MI-BOSPO je istakao važnost mikrokreditnih programa u podršci razvoju poduzetništva i jačanju lokalne ekonomije, naglašavajući dugoročne koristi koje će ovaj projekt donijeti zajednici.

## „Fana“ kupac dionica „Majevice“



Kompanije FANA i Marković iz Srebrenika kupci su 23,3 posto dionica Majevice u transakcijama obavljenim prošle sedmice. Kompanija FANA d.o.o. Srebrenik stekla je 19,3% dionica Majevice, dok je kompanija Marković kupila dodatnih oko 4% te učešće povećala na oko 21%.

Najveći dioničar trenutno je firma Denix također iz Srebrenika čiji udio iznosi 27,2 posto dionica. Majeвица, poznatija kao Corn Flips, proizvođač je snack proizvoda. Kompanija je bila u stečaju od 2005. do 2013. godine, kada je prodana većina imovine društva. Kompaniju je preuzeo Bingo i od 2014. godine bilježi stalan rast u svim parametrima poslovanja.

## Održan Tech Cruise na jezeru Modrac



Na jezeru Modrac održana je Tech Cruise konferencija, jedan od najznačajnijih događaja u regiji posvećenih tehnologiji i inovacijama. Ova konferencija, okupila je blizu 300 učesnika, uključujući top menadžment domaćih i regionalnih kompanija, vrhunske stručnjake iz IT sektora, te lidere iz oblasti cyber sigurnosti, digitalnog marketinga, umjetne inteligencije, i digitalne transformacije, kao i predstavnike lokalnih, kantonalnih i federalnih vlasti. Otvaranje konferencije obilježili su govori ključnih zvaničnika, među kojima su bili Jasmina Džambić organizatorica konferencije, Izudin Čeliković direktor domaćinske kompanije IMEL, Sabina Kovačević iz Turističke zajednice Lukavca, Edin Delić gradonačelnik Lukavca te Edin Forto ministar komunikacija i prometa BiH, koji je službeno otvorio konferenciju. Ove godine, Tech Cruise je ponudio izuzetno bogat program s više od 20 predavača, uključujući simultana predavanja o najnovijim trendovima i rješenjima iz svijeta tehnologije. Predavanja u biznis sali počela su predavanjem Google certificiranog trenera Miroslava Varge a u IT sali predavanja su započela sa voditeljem IT sektora domaćinske kompanije IMEL – Amirom Bašićem. Dan ranije održana je i Kaspersky radionica. Ovaj događaj, osim tehnoloških inovacija, ima i širi značaj za grad Lukavac i Tuzlanski kanton, jer doprinosi razvoju kongresnog turizma u regiji. Blizu 150 domaćih kompanija i predstavnici najvećih svjetskih tehnoloških brendova prisustvuju konferenciji, što je izuzetna prilika za B2B networking i umrežavanje među različitim sektorima. Organizator konferencije, kompanija IMEL d.o.o. Lukavac, koja već 30 godina pruža inovativna ERP rješenja, web i desktop aplikacije, te poslovne softverske sisteme, značajno doprinosi digitalnoj transformaciji u javnom i privatnom sektoru regije.



## Saradnja NLB i UPFBiH



U prostorijama NLB Banke d.d., Sarajevo održan je sastanak sa predstavnicima Udruženja poslodavaca u FBiH. Sastanku su prisustvovali predsjednica Uprave NLB Banke d.d. Lidija Žigić, izvršni direktor Sektora za poslovanje sa privredom NLB Banke d.d. Sarajevo Berin Lakomica, direktor Udruženja poslodavaca u FBiH Mario Nenadić i član UPFBiH Rijad Hasić. Sastankom je ozvaničeno članstvo NLB Banke Sarajevo u Udruženju poslodavaca u FBiH sa jedinstvenim ciljem unapređenja i poboljšanja uslova i poslodavaca na tržištu, te otvaranja prilike da kroz zajedničke inicijative promoviramo inovacije, održivi razvoj i odgovorne poslovne prakse. "Članstvo u Udruženju poslodavaca FBiH smatramo važnim korakom ka unapređenju poslovnog okruženja. Naša vizija uvijek je bila da doprinosimo razvoju privrede i zajednice, ne samo kroz kvalitetne usluge koje pružamo već i kroz aktivno sudjelovanje u kreiranju pozitivnih promjena. Kao član Udruženja, uvjereni smo da ćemo moći još aktivnije doprinositi jačanju ekonomske stabilnosti, promociji odgovornog poslovanja, te stvaranju boljih uslova za sve poslodavce i zaposlene u našoj zemlji", izjavila je predsjednica Uprave NLB Banke d.d. Sarajevo Lidija Žigić. Pored ostalog, razgovarano je i o nekoliko ostalih važnih tema koji se tiču digitalizacije u poslovanju, EU standarda u ESG segmentu te ostalim temama koje su u skladu sa ciljevima Banke, tržišta i Udruženja.

Udruženje poslodavaca u Federacije Bosne i Hercegovine je respektabilna platforma koja okuplja najvažnije privredne subjekte, te omogućava dijalog između poslovnog sektora, vlasti i drugih ključnih dionika.

"Veoma je važno da se NLB Banka Sarajevo priključila Udruženju u skladu sa inicijativom predstavnika Udruženja i zaključcima UO Udruženja banaka FBiH koje je podržalo pojedinačno uključivanje banaka u članstvo Udruženja. Članstvo omogućava da NLB Banka kroz rad i aktivnosti Udruženja, sudjeluje u jačanju poslovnog ambijenta, doprinosi izmjenama, dopunama i donošenju novih propisa od interesa za rad banaka. Uključivanjem u rad Udruženja, NLB Banka je osigurala i pravo da

njeni predstavnici budu birani u upravljačke i druge rukovodne strukture Udruženja, u rad uspostavljenih ekonomsko-socijalnih vijeća na svim nivoima u BiH, kao i u radne grupe, stručne savjete i druga tijela Udruženja", izjavio je direktor Udruženja poslodavaca u FBiH Mario Nenadić. Članstvom u Udruženju poslodavaca u FBiH omogućen je pristup aktuelnim informacijama od važnosti za poslodavce i poslovno okruženje, širenje poslovnih kontakata sa više od 23.000 privrednih društava i obrta naših članica, sudjelovanje na konferencijama koje organizira Udruženje tokom čitave godine i dr. Predstavnici Banke i Udruženja usaglasili su naredne korake i aktivnosti koje će zasigurno doprinijeti unapređenju politika i propisa iz predmetne oblasti te generalno osnažiti položaj privrednika i obrta u BiH, odnosno FBiH.

## Orden Evropskog pokreta Edisu Bajiću za Sajam kafe



Evropski pokret u Bosni i Hercegovini uručio je nedavno u Parlamentarnoj Skupštini BiH ordene Evropskog pokreta u BiH i priznanja, pojedincima i predstavnicima institucija, organizacija i kolektiva. Među laureatima su bili Darko Matijašević ambasador u Ministarstvu vanjskih poslova BiH, Martin Raguž nekadašnji delegat u Domu naroda Parlamentarne skupštine BiH i nekadašnji predsjednik HDZ 1990, Bihac Dilvad Felić direktor Internacionalnog muzičkog festivala, Nedim Sladić magistar meteorologije, Darko Savić predsjednik Ženskog rukometnog kluba Banja Luka i objedinitelj ženske rukometne reprezentacije BiH te **Edis Bajić idejni tvorac i osnivač prvog međunarodnog sajma kafe i čokolade Tuzla 2024 godine, inače osnivač i vlasnik UG „Activs“ Tuzla, članice Kantonalne privredne komore Tuzla.**

D.K.



Partner projekta "100 Najvećih u BiH..."

## Lukavac Cement primjer dobre prakse

U Sarajevu najuspješniji privrednici i vodeći stručnjaci iz BiH i regiona



Kompanija Lukavac Cement je bila učesnik i partner manifestacije "100 najvećih u BiH i regionu" na kojoj su se u Sarajevu okupili najuspješniji privrednici i vodeći stručnjaci iz BiH i regiona. Ovaj projekt već 37 godina organiziraju Poslovne novine. ESG principi i njihova implementacija, kao i ulaganja domaćih kompanija s ciljem postizanja i unapređenja društveno odgovornog i održivog poslovanja bili su tema jednodnevne konferencije "100 najvećih u BiH i regionu - ESG Impuls 2024". **"Lukavac Cement već godinama predstavlja primjer dobre prakse u oblasti održivog razvoja i zaštite životne sredine. Poslujući u skladu sa evropskim principima energetske efikasnosti, ali i realizacijom brojnih društveno odgovornih projekata, želimo sve potaknuti na veću odgovornost prema kvaliteti života u sredinama u kojima živimo. U našem poslovanju primjenjujemo model održivosti koji podrazumijeva da sirovine, komponente i finalni proizvodi minimalno gube na svojoj vrijednosti u cjelokupnom lancu vrijednosti, a to znači da 'otpad' iz jednog sistema postaje 'resurs' za drugi sistem, s posebnim fokusom na upotrebu obnovljivih izvora energije. Kao pioniri u upotrebi alternativnih goriva ne samo da štedimo neobnovljive prirodne resurse, nego uveliko smanjujemo**

negativni utjecaj na okoliš. Posebno je važno naglasiti da proces korištenja ove vrste goriva predstavlja siguran način valorizacije otpada što donosi višestruku korist kako za društvenu zajednicu tako i za našu fabriku", istakao je Stjepan Kumrić, generalni direktor Lukavac Cementa. Na svečanoj večeri dodjele nagrada u okviru projekta "100 najvećih u BiH i regionu", Lukavac Cement je ponovno dobio vrijedno priznanje za rezultate u djelatnosti po prihodu koji su ostvareni u 2023., koje je preuzeo Stjepan Kumrić i kazao: **"Ovo je samo još jedan od pokazatelja da je Lukavac Cement jedna od 100 vodećih kompanija u BiH i regionu, ali i jedna od najmodernijih evropskih cementara koja stalno postavlja više standarde u oblasti inovacija, društvene odgovornosti i održivosti i koja tokom 2024. godine obilježava i velikih 50 godina svog postojanja i rada"**.



Zahvaljujući predanom radu svih bivših i sadašnjih uposlenika, usklađenosti sa konceptima održivog razvoja u oblastima životne sredine, društvene odgovornosti i korporativnog upravljanja primjenom ESG standarda, poslovanje Lukavac Cementa predstavlja jedan od uspješnih modela kako graditi održivu BiH i bolju budućnost. **"Srdačno zahvaljujemo organizatoru projekta "100 najvećih u BiH", a mi nastavljamo dalje"**, poručuju iz Lukavac Cementa.

D.K.

## Lukavac Cement priredio „Dan otvorenih vrata 2024

U zelenom parku Lukavac Cementa održan je još jedan Dan otvorenih vrata. Bilo je ovo 14. izdanje tradicionalne porodične manifestacije na kojoj su se okupili brojni građani i građanke Lukavca i okoline. Raznovrsni edukativni, sportski i zabavni sadržaji su posebno uveselili djecu i mlade. „Kada smo prije mnogo godina pokrenuli ovaj projekat, znali smo da radimo nešto dobro, kvalitetno i održivo za naš grad i njegove stanovnike. Lukavčani i Lukavčanke sada s nestrpljenjem očekuju septembar kako bi u krugu naše zelene fabrike proveli dan sa svojom porodicom i dobro se zabavili. Na ovaj način, između ostalog, potičemo i razvoj sportskog duha, zdravih životnih navika i vrlo smo sretni da se iz godine u godinu družimo i zajedno rastem", istakao je Nihad Begić, direktor prodaje i marketinga Lukavac Cementa. U središtu ovogodišnjeg Dana otvorenih vrata bile su kreativne i zabavne predstave za najmlađe, ali i nastup Plesnog studija „Čarolija“ iz Lukavca. Takmičarske igre MIN2WIN, defile animatora, te pregršt zdravih zalogaja, poklona i dobre muzike učinili su ovaj dan zaista posebnim.

D.K.



## Međunarodni aerodrom Tuzla... Uspostavljanje jače saradnje sa turskim avio prijevoznicima

Vlada TK daje punu podršku JP  
„Međunarodni aerodrom Tuzla“



Vlada Tuzlanskog kantona prihvatila je Informaciju Ministarstva trgovine, turizma i saobraćaja o obavljenoj posjeti delegacije iz Republike Turske u vezi otvaranja nove avio linije Tuzla-Istanbul avio kompanije Pegasus Airlines i planirane posjete delegacije iz Republike Turske u vezi otvaranja nove avio linije Tuzla-Istanbul avio kompanije AJet. Vlada je zaključila da daje punu podršku Ministarstvu trgovine, turizma i saobraćaja i JP „Međunarodni aerodrom Tuzla“ d.o.o. za realizaciju planiranih i do sada ostvarenih aktivnosti, a sve u cilju uspostavljanja dugoročne saradnje između Tuzlanskog kantona kao dijela Bosne i Hercegovine i Republike Turske u oblasti zračnog prometa, kroz otvaranje novih avio linija koje povezuju Tuzlanski kanton sa Republikom Turskom, a radi stvaranja pretpostavki za privlačenje novih investicija u Tuzlanski kanton i dolazak većeg broja turista. Zaključkom se zadužuju Ministarstvo trgovine, turizma i saobraćaja, Ministarstvo unutrašnjih poslova, Ministarstvo finansija, Turistička zajednica Tuzlanskog kantona i JP „Međunarodni aerodrom Tuzla“ d.o.o., svako u okviru svojih nadležnosti i protokolom planirane posjete delegacije iz Republike Turske u vezi otvaranja nove avio linije Tuzla-Istanbul avio kompanije AJet koja je realizovana 7. oktobra. Na MAT je sletio prvi avion turske avio kompanije AJet. Ova niskobudžetna aviokompanija će saobraćati na redovnoj liniji Istanbul – Tuzla – Istanbul, jedna linija sedmično a očekuje se da bi se u ljetnom redu letenja trebala naći i linija za Antaliju. Zajedno sa putnicima, ovim letom u Tuzlu je stigla i visoka delegacija Ministarstva za promet i infrastrukturu Republike Turske i kompanije Ajet.

## Wizz Air povećava broj letova iz Tuzle

Više letova za Basel, Dortmund,  
Memmingen



To znači da će Tuzla do 10.12. imati 13 sedmičnih letova, četiri više nego prošle godine, do 8.1. će imati 12 letova, a nakon toga 11 letova, dva više nego prošle godine. Dok se broj letova Wizz Aira smanjuje u Beogradu, Nišu i Skoplju, ove godine u Tuzli povećava. Prošle zime kompanija je iz Tuzle imala 9 letova na 3 linije. I ove godine leti 3 linije no broj letova se značajno povećao.

Tako će letjeti:

- Basel tri sedmice leta (ponedjeljak, srijeda i petak do 15.11. pa ponedjeljak, petak i subota do 14. 1. i nakon toga ponovo ponedjeljak, srijeda i petak), a sve do 8.1. nakon četa se ukida let srijedom, te će do kraja zimskog reda letenja letjeti dvije sedmice, piše Zamaeero.
- Dortmund će letjeti pet sedmice letova, ali od 19.11. uvodi se i šesta sedmica leta (svaki dan osim subote). Tako će letjeti do 10.12. nakon čega se ukida utorak i ponovo će imati pet sedmičnih letova.
- Memmingen će se letjeti pet puta sedmično do 15.11. nakon čega se ukida petak i letjet će se četiri sedmice leta (utorak, četvrtak, subota i nedjelja), a ovako će se letjeti do kraja zimskog reda letenja.

To znači da će Tuzla do 10.12. imati 13 sedmičnih letova, četiri više nego prošle godine, do 8.1. će imati 12 letova, a nakon toga 11 letova, dva više nego prošle godine.

D.K.



Drugi o tuzlanskoj Panonici...

## Izuzetno uspješna sezona na Panonici

Jedna od najuspješnijih sezona u svom 21 godišnjem postojanju



Tuzlanska Panonska jezera su iz više razloga jedinstvena ne samo na Balkanu. Ove godine bilježe jednu od najuspješnijih sezona u svom 21-godišnjem postojanju.

„Gledam Banat, Srem i Bačku s Fruške Gore, gledam tako, a u duši lom, tu je nekad, kažu knjige, bilo more, čekalo me pa presušilo“, pjevao je čuveni kantautor Đorđe Balašević u svom velikom hitu „Panonski mornar“. I zbilja, prije više miliona godina na području bivše Jugoslavije postojalo je Panonsko more koje je prije pet miliona godina isušilo. No, njegovi ostaci su ostali su tako duboko pod površinom zemlje. Tako i u Tuzli.

Slana voda, slanica, je u ovom sjeveroistočnom bosanskom gradu vijekovima eksploatisana, a kao posljedica toga jezgro grada je počelo tonuti. Stare građevine iz vremena Austro-Ugarske monarhije morale su biti srušene. U srcu grada se više nije smjelo ništa graditi. Gradonačelnik Tuzle Jasmin Imamović, uz savjete tuzlanskih geologa, 2003. godine odlučuje da slanu vodu pusti na površinu i na tom području napravi kompleks jezera, danas poznat kao Panonika Tuzla, piše Deutsche Welle.

Ovogodišnja sezona jedna od najuspješnijih u posljednjih 21 godinu

Direktor Javnog preduzeća Panonika Tuzla Maid Porobić je ponosan na ono što je postignuto u zadnjih 21 godinu.

„Ove godine je Panonska jezera posjetilo više od 420.000 ljudi. Do kraja augusta je tzv. glavna sezona, a nakon nje počinje i podsezona. Jezera su učinila čuda u našem gradu. U ovom periodu smo imali oko šest miliona posjetilaca, iz Tuzle i drugih dijelova Bosne i Hercegovine, susjednih zemalja, ali i iz cijelog svijeta, jer se naša dijaspora tradicionalno vraća u ovaj grad, za koji ih vežu korijeni. Tuzla je lijep grad i bez Panonike, ali joj ona daje posebnost koja je prepoznata u BiH i u cijeloj regiji“, priča Porobić za DW.

### • Panonska jezera posebno omiljena kod dijaspore iz Njemačke

Ove riječi mogu potvrditi mnogi posjetitelji Panonike. Na svakom koraku se čuje njemački jezik. Djeca sa roditeljima radije govore njemački, stariji međusobno komuniciraju na bosanskom jeziku. Jedan od posjetilaca, Sanjin Konjić, je sa prijateljima došao iz Düsseldorfa gdje radi kao državni službenik. Glasno se zabavljaju na bosanskom i njemačkom, plivaju, slušaju muziku koja podsjeća na klub muziku kakva se sluša na Ibizi, piju pivo ili koktele. „Party-Stimmung“. „Ja sam rođen u Njemačkoj, ali moji roditelji su Tuzlaci, njemački gastarbajteri. Ovdje su moji korijeni, tu sam tako opušten. Sretan sam što smo kod kuće

govorili bosanski, to je važno da se mogu sporazumjeti sa familijom. Mi si možemo priuštiti odmore bilo gdje na svijetu, ali ovdje me vuče srce. Kad god mogu, dođem ovdje, budem nekoliko sedmica, a ponekad nastavim odavde na Jadransko more“, priča Sanjin.

Panonska jezera su za sebe otkrili i Hrvati i Srbi koji umjesto na more dolaze u Tuzlu, jer plivaju u slanoj, morskoj vodi te uživaju u kulinarskim specijalitetima koji su mnogo povoljniji nego u susjednoj Hrvatskoj, i to ne samo u tradicionalnoj bosanskoj već i u mediteranskoj kuhinji.

### • Panonska jezera imaju ljekovito dejstvo na zdravlje

Panonska jezera su veoma omiljena i kod Tuzlaka. Naročito kod penzionera koji, zbog niskih penzija, a i zbog starosti, tako i tako ne mogu priuštiti odlaske na more. Jezerima se pripisuju i ljekovita dejstva, jer je salinitet vode veći od onog u Jadranskom moru. Džemo Mehmedović Panoniku posjećuje od prvog dana. „Meni su 93 godine. Skoro svakog dana se dovozim lokalnim autobusom iz jednog sela u blizini Tuzle. Zdrav sam k'o dren. Nemam potvrde od ljekara da je to tako zahvaljujući jezeru, ali ljekarima tako i tako ne idem često. Ovdje se i družim s dobrim ljudima, igramo karte, pričamo, plivamo. Ne može mi biti ljepše i dolaziti ću koliko god budem mogao“.

### • Bogat kulturni program

U ljetnoj sezoni se Tuzla pretvara i u jedan od kulturnih centara regije. U centru grada na Trgu slobode su se u okviru ljetnog kina prikazivali filmovi sa Sarajevo film festivala, a na jezerima se redovno održavaju koncerti popularnih izvođača iz cijele regije. O fenomenu Panonskih jezera je poznati bh režiser Dino Mustafić snimio dokumentarni film „Panonika na zmu soli“ koji je početkom augusta pobijedio na međunarodnom Green Montenegro festivalu. U filmu Mustafić objašnjava fenomen Panonskih jezera koji su ovaj nekada veoma zagađeni industrijski grad pretvorili u pravu turističku atrakciju. Direktor Panonike Maid Porobić ponosno ističe i da Panonika ulaže u ekologiju; u okviru jezera su već postavljene solarne ćelije, kojima se proizvodi dio električne energije za održavanje čistoće vode. Sunca ovdje ima dovoljno. On poziva i neke nove goste na dolazak u Tuzlu, da se liječe, zapjevaju pa i zajedno spontano zaigraju neko tradicionalno kolo.

fokus.ba



Obavještenje kandidatima...

## Seminar za pripremanje pravosudnog ispita

Seminar će trajati sedam vikenda - Prijave ostaju otvorene do popune mjesta - Datum početka seminara će se odrediti nakon formiranja grupe



Kantonalna privredna komora Tuzla obavještava sve zainteresovane kandidate da počinje formiranje grupe za organizaciju

### Seminara za pripremanje polaganja pravosudnog ispita.

Program seminara provodit će se na osnovu i u okviru Programa polaganja pravosudnog ispita od 11.10.2018. godine i Pravilnika o polaganju pravosudnog ispita od 11.12.2019. godine, izmjene i dopune od 18.3.2020. godine Federalnog ministarstva pravde.

Predavači na seminaru su članovi/ispitivači Komisije za polaganje pravosudnog ispita na nivou Federacije Bosne i Hercegovine.

Seminar će trajati 15 dana (7 vikenda) i obavljat će se u velikoj sali Kantonalne privredne komore Tuzla.

U toku seminara obradit će se materija iz krivičnog prava, građanskog prava sa porodičnim pravom, privrednog prava, upravnog i radnog prava, ustavnog sistema i organizacije pravosuđa. U okviru seminara realizirat će se i praktične vježbe (pismeni radovi) za polaganje pismenog dijela ispita iz krivičnog i građanskog, odnosno porodičnog prava. Nakon završetka obuke, polaznici će dobiti potvrdu o pohađanju seminara za pripremanje polaganja pravosudnog ispita.

Broj mjesta je ograničen na 30 kandidata. Prijave ostaju otvorene do popune mjesta.

Datum početka seminara će se odrediti nakon formiranja grupe (minimalni broj učesnika je 20).

Iznos kotizacije je 995,00 KM po polazniku. U cijenu je uračunat i PDV. Navedeni iznos se može platiti u tri rate.

Molimo, ukoliko ste zainteresovani za učešće na navedenom seminaru da popunjenu prijavu, u prilogu, pošaljete na e-mail edina@kpktz.ba ili fax broj 035 369 552. Kontakt osoba Edina Kurtić, telefon broj 035 369 551.

PRIJAVA na: <https://www.kpktz.ba/index.php/vijesti/1600-seminar-za-pripremanje-pravosudnog-ispita>



## Iznajmljivanje kancelarijskog prostora u Komori

Kantonalna privredna komora Tuzla objavljuje izdavanje kancelarijskog prostora. Riječ je o dvije kancelarije površine po 14 metara kvadratnih, na drugom spratu zgrade Komore, Trg slobode bb.


Više informacija u Komori ili na telefon sa broja: 035/369-550 ili putem maila almir@kpktz.ba, kontakt osoba Almir Mešić.



Javni poziv za usavršavanje...

## Usavršavanje za NO i UO, prijave za novu grupu

Poziv za dostavu prijave za ciklus usavršavanja članova NO i uprava u Tuzli



KANTONALNA PRIVREDNA KOMORA TUZLA

U skladu sa Uredbom o usavršavanju predsjednika i članova nadzornih odbora i uprava privrednih društava sa učešćem državnog kapitala ("Službene novine F BiH", br. 71/09, 33/10, 23/11, 83/11, 2/13, 80/13, 48/15, 60/16, 88/17 i 19/22), te Programom usavršavanja ("Službenenovine F BiH", br. 69/18), Privredna/Gospodarska komora FBiH, u saradnji s Kantonalnom privrednom komorom Tuzla poziva sve zainteresirane da dostave prijave za novi ciklus usavršavanja članova NO i uprava privrednih društava sa učešćem državnog kapitala, čije je održavanje planirano u Tuzli u oktobru/novembru 2024. godine.

Zainteresirane za učešće u ovom ciklusu usavršavanja molimo da u najkraćem roku dostave prijavu za usavršavanje, koja sadrži:

- prijavni upitnik
- ovjerenu kopiju diplome o stečenoj stručnoj spremi,
- uvjerenje o radnom iskustvu u struci (original ili ovjerena kopija),
- izjavu o učešću.

Prijave dostavljati lično ili putem pošte na adresu:

Privredna/Gospodarska komora Federacije BiH

ul. Branislava Đurđeva br. 10

71000 Sarajevo

ili

Kantonalna privredna komora Tuzla

Trgslobode b.b.

75000 Tuzla

sa naznakom:

„Javni poziv za dostavljanje prijave za usavršavanje članova NO i uprava društava sa učešćem državnog kapitala – ne otvaraj”.

Nepotpune prijave za javni poziv neće biti prihvaćene.

Kontaktosobe za detaljnije informacije:

Aida Handžić – tel: 033 566 322 ili e-mail: a.handzic@kfbih.com

Edina Kurtić – tel: 035369551 ili e-mail: edina@kpktz.ba

Obavještenje o novom ciklusu usavršavanja, sa preliminarnim terminima održavanja predavanja, možete preuzeti na:

<https://kpktz.ba/index.php/test/2452-usavsavanja-clanova-no-i-uprava-od-21-9-do-5-10>




## PRIVREDNA KRETANJA U TUZLANSKOM KANTONU ZA I-VI 2024. GODINE

Prema podacima za prvo polugodište 2024. godine, došlo je do pada obima industrijske proizvodnje u Tuzlanskom kantonu za 4,1% u odnosu na isti period 2023. godine. Rast industrijske proizvodnje je ostvaren u kategoriji netrajnih proizvoda za široku potrošnju od 11% dok su ostale industrijske grupacije bilježile pad.

Industrijska proizvodnja	Index	%
Ugalj i lignit	115.4	15.4
Ostale rude i kamen	98.9	-1.1
Prehrambeni proizvodi	126.7	26.7
Proizvodnja pića	98.8	-1.2
Proizvodnja tekstila	87.8	-12.2
Proizvodnja odjeće	76.9	-23.1
Koža i srodni proizvodi	101.9	1.9
Prerada drveta osim namještaja	93	-7
Proizvodnja koks i derivata nafte	84.3	-15.7
Hemikalije i hemijski proizvodi	99.5	-0.5
Farmaceutski proizvodi	105.1	5.1
Proizvodi od gume i plastičnih masa	102.9	2.9
Ostali nemetalni mineralni proizvodi	102.4	2.4
Proizvodnja baznih metala	110.1	10.1
Metalni proizvodi osim mašina	97.2	-2.8
Električna oprema	119.4	19.4
Mašine i uređaji	68.9	-31.1
Proizvodnja namještaja	71.8	-28.2
Proizvodnja i snabdijevanje el.energijom, plinom, parom i toplom vodom	92.4	-7.6

Indeks obima industrijske proizvodnje I-VI 2024/ I-IV 2023 (%)



Industrijska proizvodnja I-VI 2024/ I-IV 2023 (%)

Ukupni izvoz iz Tuzlanskog kantona u prvih šest mjeseci 2024. godine iznosio je 1.184,5 miliona KM što je za 11,7% manje u odnosu na nominalnu vrijednost izvoza u istom periodu 2023. godine. U istom periodu ostvaren je uvoz u vrijednosti od 1.427,4 miliona KM, što je pad nominalne vrijednosti uvoza od 1,1% u odnosu na isti period prošle godine. Ostvaren je vanjskotrgovinski deficit od 243 miliona KM, a pokrivenost uvoza izvozom je 83%.

Najveći izvoz je u hemijskoj i metaloprerađivačkoj industriji, a najvažniji vanjskotrgovinski partneri su Austrija i Njemačka.

I-VI 2024	Izvoz (000) KM	Uvoz (000) KM
Hrana i piće	40.396	129.752
Industrijski materijali	500.294	542.322
Goriva i maziva	124.436	181.730
Kapitalni proizvodi	213.867	275.118
Transportna sredstva i dijelovi	78.036	90.571
Proizvodi za široku potrošnju	227.453	207.955

Izvoz i uvoz prema BEC I-VI 2024.

U periodu januar – juni 2024. godine, prema podacima Porezne uprave FBiH, u Tuzlanskom kantonu je naplaćeno 673.803.480 KM javnih prihoda. To je 7,76% više u odnosu na prvo polugodište 2023. godine. Tuzlanski kanton je drugi u učešću u ukupnoj naplati u FBiH sa učešćem od 17,1%.

Na dan 30.6.2024. godine u Tuzlanskom kantonu je bilo 105.181 zaposlenih. U odnosu na isti datum 2023. godine, došlo je do rasta zaposlenih za 1.178 osoba ili 1,13%. Na kraju juna, na evidenciji Službe za zapošljavanje u Tuzlanskom kantonu je evidentirano 60.877 nezaposlenih.

Prosječna neto plata u Tuzlanskom kantonu u junu 2024. je iznosila 1.226 KM što je ispod prosjeka Federacije BiH. U odnosu na kantonalni prosjek iz 2023. godine, neto plaća je veća za 5,6%.

Djelatnost	Tuzlanski kanton	
	Neto plaća (VI 24)	VI 24/ 2023 %
A Poljoprivreda, šumarstvo i ribolov	1.066	7,0
B Vadenje ruda i kamena	1.529	5,8
C Prerađivačka industrija	1.011	5,9
D Proizvodnja i snabdijevanje el.en., plinom	1.943	0,2
E Snabdijevanje vodom i uklanjanje otpadnih voda	1.202	6,0
F Građevinarstvo	912	3,2
G Trgovina na veliko i malo	959	6,0
H Prevoz, skladištenje i komunikacije	914	2,9
I Hotelijerstvo i ugostiteljstvo	835	0,5
J Informacije i komunikacije	2.040	6,8
K Finansijske djelatnosti	1.659	3,2
L Poslovanje nekretninama	1.037	3,0
M Stručne, naučne i tehničke djelatnosti	1.174	-3,2
N Administrativne i pomoćne uslužne djelatnosti	1.036	7,1
O Javna uprava i odbrana	1.756	8,2
P Obrazovanje	1.168	7,6
Q Zdravstvena socijalna zaštita	1.765	0,9
R Umjetnost, zabava i rekreacija	1.163	9,6
S Ostale uslužne djelatnosti	1.308	7,2

STRUČNA SLUŽBA KOMORE



**THE CHAMBER OF ECONOMY OF TUZLA CANTON**



**TUZLA CANTON**

Your Business Partner

